

四庫全書

史部

欽定四庫全書

史部

文獻通考卷二百九十四

六十五

詳校官內閣學士_臣瑞保

編修_臣程嘉謨覆勘

覆校官中書_臣孫希旦

校對官中書_臣金光悌

謄錄舉人_臣龐兆懋

欽定四庫全書

文獻通考卷二百九十四

鄱陽馬端臨貴與著

象緯考十七

瑞星

漢武帝元封元年望氣王朔言候獨見鎮星出如爪食頃復入有司皆曰陛下建漢家封禪天其報德星云

德星

即鎮星也言天以德星報帝

晉孝武太元二年七月己卯老人星見 三年七月乙酉老人星見南方 十月丁巳老人星見

梁武帝天監四年八月庚子老人星見占曰老人星見主壽昌自是每年恒以秋分後見於參南至秋分而伏武帝壽考之象云

宋太祖皇帝開寶四年八月辛卯景星見

真宗景德三年四月戊寅周伯星出氐南騎官西一度狀半月有芒角煌煌然可以鑒物歷庫樓東八月隨天

輪入濁十一月復見在氐自是常以十一月晨見東南
方八月西南入濁占曰天下無兵國大昌又氐為露寢
即天子正寢也 大中祥符七年正月己酉含譽星見
其年九月丙戌又見似彗有尾而不長與周伯星同占
太祖朝壽星見 乾德三年八月辛酉 四年八月乙
卯 六年正月戊申 開寶二年七月乙亥

太宗朝壽星見 太平興國四年八月乙亥 五年八
月己卯 六年八月己卯 八年八月辛卯 雍熙三

年八月己酉 四年八月辛亥 端拱元年八月乙卯
二年八月癸亥 淳化元年八月丁卯 二年八月
辛未 三年八月戊寅 四年九月己亥 五年八月
己丑 至道元年八月己亥 二年閏七月己亥 三
年八月辛丑

真宗朝壽星見 咸平元年八月癸丑 二年八月癸
亥 三年八月丁卯 四年八月甲子 五年八月乙
丑 六年八月丙子 景德元年八月癸酉 二年八

月庚辰 三年八月庚寅 四年二月己卯八月甲午
大中祥符元年正月丁亥八月丙申 二年二月壬
辰八月乙巳 三年二月辛巳八月己酉 四年正月
戊寅八月癸丑 五年正月辛巳八月己未 六年五
月庚子八月丙寅 七年正月癸丑八月己巳 八年
七月癸酉 九年正月甲寅八月壬午 天禧元年八
月癸巳 二年正月丁巳八月辛卯 五年二月辛卯
八月己亥 四年八月己亥 五年二月丙午八月乙

已皆出於丙

仁宗朝壽星見 天聖元年二月己亥 二年八月丙
子 四年七月壬申 景祐二年正月己丑 至和三
年二月辛卯八月己未 嘉祐二年八月庚申 三年
八月丙辰 四年正月庚戌八月癸未 五年八月庚
午 六年正月癸丑八月壬辰 七年正月辛亥 八
年正月辛酉

英宗朝壽星見 治平元年二月己丑七月癸巳 二

年二月癸巳八月己亥 三年正月庚辰八月庚戌
神宗朝老人星見 治平四年二月癸巳八月戊申
熙寧元年正月乙未八月己卯 二年二月乙卯八月
壬戌 三年正月甲寅八月癸酉 四年二月己未八
月丁丑 五年二月己未閏七月乙亥 六年正月庚
午八月丁酉 七年二月甲申八月庚寅 八年二月
己丑八月庚戌 九年二月丁酉八月庚子 十年正
月己卯九月戊申 元豐元年二月己酉八月丙午

二年二月壬戌八月乙卯 三年二月甲寅八月己未
四年八月丁卯 五年二月甲戌八月己巳 六年
二月己未八月丁丑 七年二月辛巳八月己卯 八
年二月庚辰八月辛巳

哲宗朝老人星見 元祐元年二月戊寅八月庚子

二年二月庚寅九月辛亥 三年二月癸巳八月己亥
四年二月壬子八月丁未 五年正月甲午八月辛
亥 六年二月己亥閏八月壬戌 七年正月壬子八

月壬戌 八年二月丙寅八月己巳 九年二月乙丑
紹聖元年八月庚子 二年二月壬午八月丁丑
三年二月庚午八月癸未 四年二月甲申八月甲申
五年二月庚辰 元符元年八月辛卯 二年二月
乙未九月壬辰

徽宗朝老人星見 崇寧元年二月壬寅八月癸丑
二年二月甲寅八月庚戌 三年二月戊午八月辛酉
四年二月庚申八月丙寅 五年二月戊辰八月甲

戊 大觀元年二月乙亥八月丁丑 二年二月甲午
八月壬午 三年二月戊子八月癸巳 四年二月乙
未閏八月丁酉 政和元年二月癸卯八月己亥 二
年二月乙巳八月己酉 三年二月甲午八月己未
四年二月己酉八月辛未 五年二月庚申八月甲子
六年閏正月壬戌八月丁卯 七年五月戊午八月
丙子 八年二月壬申八月乙亥 宣和元年二月癸
未八月癸未 二年二月辛巳八月己丑 三年二月

丙戌八月癸巳 四年二月己亥八月辛丑 五年二月庚子八月丙午 六年二月戊申八月辛亥 七年二月癸丑八月庚申皆見於丙主人君壽昌天下安寧賢士進用

自太平興國以來星見必賀至熙寧四年詔罷賀禮
客星

漢武帝元光元年六月客星見於房占曰為兵起其二年十一月單于將十萬騎入武州漢遣兵三十餘萬以

待之

昭帝元鳳四年九月客星在紫宮中斗樞極間占曰為兵其五年六月發三輔郡國少年詣北軍

宣帝地節元年六月戊戌甲夜客星居左右角間東南指長可二尺色白占曰有姦人在宮庭間其丙寅又有客星見貫索東北南行至七月癸酉夜入天市芒炎東南指其色白占曰有戮卿一曰有戮王期皆一年遠二年是時楚王延壽謀逆自殺四年霍氏謀反誅黃龍

元年三月客星居王良東北可九尺長丈餘西指出閣道間至紫宮其十二月宮車晏駕

元帝初元元年四月客星大如瓜色青白在南斗第二星東可四尺占曰為水饑其五月渤海水大溢六月關東大饑民多餓死瑯琊郡人相食 二年五月客星見

昴分居卷舌東可五尺青白色炎長三寸占曰天下有妄言者其十二月鉅鹿郡尉謝君男詐為神人論死父

免官

孟康曰姓謝名君男者兒也不記其名直言男耳

後漢光武建武三十一年十月有客星焰二尺許西南行至明年二月二十二日在輿鬼東北六尺所滅凡見百一十三日輿鬼尸星主死亡客星居之為死喪後二年光武崩

按漢書嚴光傳帝即位思光召之至京入宮論道舊故因共偃卧光以足加帝腹明日太史奏客星犯御座甚急帝笑曰朕故人嚴子陵共卧耳通鑑載徵光事在建武五年然史志五年不言客星之

事云

孝明永平四年八月辛酉客星出梗河西北指貫索七十日去梗河為胡兵至五年北匈奴七千騎入五原雲中貫索貴人之牢其十二月陵鄉侯梁松坐怨望誹謗下獄死 七年三月庚戌客星光氣二尺所在太微左執法南端門外凡見七十五日 八年十二月戊子客星出東方 九年正月戊申客星出牽牛長八尺歷建星至房南滅見至五十日牽牛主吳越房星為宋後廣

陵王荆楚王英謀逆事覺自殺廣陵屬吳彭城古宋地
十三年十一月客星出軒轅四十八日十四年正
月戊子客星出昴六十日在軒轅右角稍滅昴主邊兵
後一年漢遣竇固耿秉等將兵擊匈奴一曰軒轅右角
為貴相昴為獄事時考楚事未竟司徒虞延坐與楚王
英交通自殺

孝章元和元年四月丁巳客星晨出東方在胃八度長
三尺歷閣道入紫宮留四十日滅閣道紫宮天子之宮

也客星犯入留久為大喪後四年帝崩

孝和永元十三年十一月乙丑軒轅第四星間有小客星色青黃軒轅為後宮星出之為失勢其十四年六月陰皇后廢十六年四月戊午客星出紫宮西行至昴五月滅昴為趙後一年和帝崩又一年殤帝崩無嗣太后遣迎清河孝王子即位是為安帝清河趙地是其應也

孝安永初元年八月戊申客星在東井弧星西南占為

大水是歲郡國四十一縣三百一十五雨水四瀆溢傷

稼壞城郭殺人民 三年六月甲子客星大如李蒼白

芒氣長二尺西南指上階星指上階為三公後太尉張

敏免官 元初二年十一月甲午客星見西方己亥在

虛危南至胃昂

郝萌曰客星入虛大人當之又曰客星守危強臣執國命在后族又且大風有

危敗黃帝星經曰客星入

守若出危大饑民食貴 延光三年十一月客星見

天市占為貴人喪四年帝崩

孝順永建六年十二月壬申客星芒氣長二尺餘西南

指色蒼白在牽牛六度客星芒氣白為兵牽牛為吳越
後一年會稽海賊曹於等殺長吏拘奪吏民揚州六郡
逆賊章何等稱將軍犯四十九縣大攻畧吏民陽嘉
元年閏月戊子客星氣白廣二尺長五丈起天苑西
南主馬牛為外軍色白為兵是時燉煌太守徐白使疏
勒王盤等兵二萬人入于闐界虜掠斬首三百餘級烏
桓校尉耿昇使烏桓親漢都尉戎末槐等出塞鈔鮮卑
斬首獲生口財物鮮卑怨恨鈔遼東代郡殺傷吏民是

後西戎北狄為寇害以馬牛起兵馬牛亦死傷於兵中至十餘年乃息

孝靈光和五年六月丁卯客星如三升椀出貫索西南行入天市至尾而消占曰天市為貴人喪明年宮車晏駕中平二年十月癸亥客星出南門中大如筵五色喜怒稍小至後年六月消占曰為兵至六年司隸校尉袁紹誅滅中宮大將軍部曲吳匡攻殺車騎將軍何苗死者數千人

魏文帝皇初三年九月甲辰客星見太微左掖門內占
曰客星出太微國有兵喪十月帝南征孫權是後累有
征役

明帝景初二年十月癸巳客星見危逆行在離宮北騰
蛇南甲辰犯宗星巳酉滅占曰客星所出有兵喪虛危
為宗廟又為墳墓客星近離宮則宮中將有大喪就先
君於宗廟之象也三年正月帝崩

高貴鄉公甘露四年十月丁丑客星見太微中轉東南

行歷軫宿積七日減占曰客星出太微有兵喪景元元年帝為成濟所弑

晉惠帝永興元年五月客星守畢占曰天子絕嗣一曰大臣有誅時諸王擁兵其後惠帝失統終無繼嗣

海西公太和四年二月客星見紫宮西垣至七月乃減占曰客星守紫宮臣弑主六年桓溫廢帝

孝武太元十一年三月客星在南斗至六月乃沒占曰有兵有赦是後司雍充冀常有兵役十二年正月大赦

八月又大赦 十八年二月客星在尾中至九月乃滅
占曰燕有兵喪二十年慕容垂伐魏為所破死者數萬
人二十一年垂死國遂衰亡

安帝元興元年十月有客星色白如粉絮在太微西至
十二月入太微占曰兵入天子庭二年十二月桓元篡
位放遷帝后於潯陽三年二月劉裕盡誅桓氏

宋文帝元嘉十九年客星在北斗化為彗

詳見
彗門

陳廢帝光大二年六月壬子客星見氐東

周武帝保定元年九月丁巳客星見於翼 天和三年
七月己未客星見房心白如粉絮大如斗漸大東行八
月入天市長如匹所復東行犯河鼓右將癸未犯匏瓜
又入室犯離宮九月壬寅入奎稍小壬戌至婁北一尺
所滅凡六十九日占曰兵起若有喪白衣會為饑旱國
易政又曰兵犯外城大臣誅 建德三年二月戊午客
星大如桃青白色出五車東南三尺所漸東行稍長二
尺所至四月壬辰入文昌丁未入北斗魁中後出魁漸

小凡見九十三日占曰天下兵起車騎滿野人主有憂
又曰天下亂兵大起臣謀主其七月衛王直舉兵反討
禽之十月始州民王鞅擁衆反討平之

唐文宗太和三年十月客星見於水位 開成二年三
月甲申客星出於東井下戊子客星別出於端門內近
屏星四月丙午東井下客星沒五月癸酉端門內客星
沒壬午客星如孛在南斗天籥旁

昭宗乾寧三年有客星三一大二小在虛危間乍合乍

離相隨東行狀如鬪經三日而二小星沒其大星後沒
虛危齊分也 光化三年正月客星出於中垣宦者旁
大如桃光炎射宦者宦者不見 天復二年正月客星
如桃在紫宮華蓋下漸行至御史丁卯有流星起文昌
抵客星客星不動已巳客星在杠守之至明年猶不去
占將相出兵

梁太祖乾化元年五月客星犯帝座

宋太祖建隆二年十二月己酉客星出天市垣宗人星

東微有芒彗三年十二月辛未西南行入氐宿二月癸丑至七星沒

太宗太平興國八年二月甲辰客星出太微垣端門東近屏星北行占曰主弼臣失禮免 端拱二年七月丁亥客星出北河星西北稍暗微有芒彗指西南 淳化元年正月辛巳客星出軫宿逆行至張七十日經四十六度乃不見占云有土功又云有使來

真宗景德二年八月甲辰客星出紫微天樞側孛孛然

如粉絮稍入垣內歷御女華蓋凡十一日沒占曰后妃
災踰年莊穆皇后崩 三年三月乙巳客星出東南方
大中祥符四年正月丁丑客星見南斗魁前占曰有
赦令其年親祀汾陰后土大赦 天禧五年四月丙辰
客星出軒轅前星西北大如桃速行經軒轅大星入太
微垣掩右執法犯次將歷屏星西北凡七十五日入濁
沒占曰周雉之分大臣憂

仁宗明道元年六月乙巳客星出東北方近濁如木星

太微有芒彗至丁巳凡十三日而沒 至和元年五月
己丑客星出天關東南可數寸歲餘消沒

神宗熙寧二年六月丙辰客星出箕度中至七月丁卯
犯箕乃散主民饑大臣有見棄者或大水河溢船行平
地 三年十一月丁未客星出天囷主倉庫憂火災

哲宗元祐六年十一月辛亥客星出參度中犯掩厠星
主有暴兵米貴晉分兵災壬子犯九旂星 十二月癸
酉入奎至七年三月辛亥乃散主邊兵動

高宗紹興八年五月客星守婁魯分也敵將悟室占之
太史曰無傷至七月敵殺魯充滕虞等二十一王敵亦
應天象也 九年客星守亢亢陳分也九月敵將悟室
被誅悟室封陳王云 八年六月己巳客星出奎宿犯
傳舍占客星亦妖星天之使者見於天而無常所入列
舍以示休咎星大者事大而禍深色白其分有兵喪今
客星出紫微外座傳舍星宜備姦使邊人侵境又云出
奎宿為兵姦臣偽惑天子於是金人遣使來爭執進書

儀甲戌客星守傳舍第五星 九年正月癸酉客星始
不見自去年六月己巳至是凡一百八十五日乃消伏
時金使久在館至是乃去

寧宗嘉泰三年六月乙卯東南方泛出一星在尾宿青
白色無芒彗係是客星如土星大占客星者天之使者
偶見於天而無常所入列宿以示休咎色青憂疾白為
兵喪兵革罷民饑死於是韓侂胄方謀用兵

雲氣 虹蜺

漢昭帝元平元年正月庚子日出時有黑雲狀如焱風
亂鬻黯轉出西北東南行轉而西有頃亡占曰有雲如
衆風是謂風師法有大兵其後兵起烏孫五將征匈奴

二月乙酉牂雲如狗赤色長尾三枚夾漢西行

詳見流星門

成帝永始二年二月癸未夜東方有赤色大三四圍長
二三丈索索如樹南方有大四五圍下行十丈餘皆不
至地滅占曰東方客之變氣狀如樹木以此知四方欲
動者明年十二月己卯尉氏男子樊並等謀反賊殺太

守叔略令丞自稱將軍皆誅死庚子山陽鎮官亡徒蘇
令等殺傷吏民取庫兵聚黨數百人為大賊踰年經歷
郡國四十餘一日有兩氣同時起並見而並令等同月
俱發也

哀帝建平元年正月丁未日出時有著天白氣廣如一
疋布長十丈餘西南行謹如雷西南行一刻而止名曰
天狗傳曰言之不從則有犬禍詩妖到其四年正月二
月三月民相驚動謹謹奔走傳行詔籌祠西王母又曰

從目人當來十二月白氣出西南從地上至天出參下
貫天廁廣如一疋布長十丈餘十餘日去占曰天子有
陰病其三年十一月壬子太皇太后詔曰皇帝寬仁孝
順奉承聖緒靡有解怠而久病未瘳夙夜惟思殆繼體
之君不宜改作春秋大復古其復甘泉泰畤汾陰后土
如故

王莽地皇四年漢兵起南陽至昆陽莽遣王尋王邑
將諸郡兵號百萬圍昆陽城數重軍勢甚盛晝有雲

氣如壞山墮軍上軍人皆厭所謂營頭之星也占曰

營頭之所墮其下覆軍流血三千里

袁山松書曰怪星晝行名曰營

頭行振大誅也

時光武將兵救昆陽殺王尋莽軍敗散王邑

還長安莽敗俱誅死營頭之變覆軍流血之應也

和帝永元十二年十一月癸酉夜有蒼白氣長三丈起

天園東北指軍市見積十日占曰兵起十日期歲明年

十一月遼東鮮卑二千餘騎寇右北平十六年四月

丁未紫宮中生白氣如粉絮占為喪後一年和帝崩殤

帝即位一年崩

順帝永建二年九月戊寅有白氣廣三尺長十丈餘從北落師門南至斗

靈帝熹平二年八月白氣如一足練衝北斗第四星占白氣衝北斗為大戰明年冬揚州刺史臧旻等攻盜賊斬首數千級 光和元年六月丁丑有黑氣墜北宮溫明殿東庭中黑如車蓋起奮迅身五色有頭體長十餘丈形貌似龍上問蔡邕對曰所謂天投蜺者也不見足

尾不得稱龍易傳曰蜺之比無德以色親也潛潭巴曰
虹出后妃陰脅王者又曰五色迭至照於宮殿有兵革
之事演孔圖曰天子外苦兵威內奪臣無忠則天投蜺

按邕集稱曰演孔圖曰蜺者斗之精也失度投蜺
見態主惑於毀譽合誠圖曰天子外苦兵者也變不

空生占不空言

邕對又曰意者陛下樞機之內衽席之
上獨有以色見進陵尊踰制以昭變象

若羣臣有所毀譽聖意低迴未知誰是兵戎未息威權
漸移忠言不聞則虹蜺所在生也抑內寵任中正決毀
譽分直邪各得其所勒守衛整武
備威權之機不以假人則其效也

先是立皇后何氏皇后每齋當謁祖廟輒有變異不

得謁中平元年黃巾賊張角等立三十六方起兵燒
郡國山東七州處處應角遣兵外討角等內使皇后
二兄為大將統兵其年宮車晏駕皇后攝政二兄秉
權譴讓帝母永樂后令自殺陰呼并州牧董卓欲共
誅中官中官逆殺大將軍進兵相攻討京都戰者塞
道皇太后母子遂為太尉卓等所廢黜皆死天下之
敗兵先興於官省外延海內二三十歲其殃禍起自
何氏

袁山松書曰是年七月虹晝見御
座玉堂後殿前庭中色青赤也

晉惠帝永興元年十二月壬寅夜有赤氣亘天砰隱有聲
二年十月丁丑赤氣見北方東西竟天占曰並為
大兵砰隱有聲怒之象也是後四海雲擾九服交兵
光熙元年十二月甲申有白氣若虹中天北下至地夜
見五日乃滅占曰大兵起明年王彌起青徐汲桑亂河
北毒流天下

懷帝永嘉三年十二月乙亥有白氣如帶出南北方各
二起地至天貫參伐中占曰天下大兵起四年三月司

馬越收繆允等又三方雲擾攻戰不休五年三月司馬越死於寧平城石勒攻破其衆死者十餘萬人六月京都焚滅帝如虜庭

愍帝建興元年十月己巳夜有赤氣曜於西北荊州刺史陶侃討杜弢之黨於石城戰敗

宋文帝元嘉三十年正月乙亥朔會羣臣於太極前殿有青黑氣從東南來覆映宮上是年二月元凶劼構逆帝崩於合殿三月武陵王討劼建牙於軍門有紫雲二

陰於牙上

陳宣帝太建四年有白氣如虹自北方貫北斗紫宮

十二年二月壬寅白虹見西方占曰有喪後一年帝崩
北齊後主天統三年五月戊寅甲夜西北有赤氣竟天
夜中始滅十月丙午天西北頻有赤氣占曰有大兵大
戰後周武帝總衆來伐

周武帝天和二年十月辛卯有黑氣一大如杯在日中
甲午又加一經六日乃滅占曰臣有蔽主之明者 六

年二月己丑夜有蒼雲廣三丈經天自戌加辰 建德
四年十月癸亥帝率衆攻晉州是日虹見晉州城上首
向南尾入紫宮長十丈餘庚午克之丁卯夜白虹見長
十餘丈頭在南尾入紫宮中占曰天下兵戰流血又曰
若無兵必有大喪至六年正月平齊

靜帝大象二年六月甲戌有赤氣起西方漸東行徧天
唐高祖武德初隋將堯君素守蒲州有白虹下城中
太宗貞觀十一年七月一日黃氣竟天大雨穀水溢

高宗永隆元年六月戊子虹蜺亘天蜺者斗之精占曰
后妃陰脅王者又曰五色疊至照於宮殿有兵

武太后延載元年六月幽州都督孫佺帥兵襲奚將入
賊境有白虹垂頭於軍門占曰其下流血

中宗景龍元年九月十八日有赤氣竟天其光燭地三
日乃止

肅宗至德二載正月丙子南陽夜有白虹四上亘百餘
丈

代宗寶應元年七月西北方有赤光亘天貫紫微漸流於東彌漫北方照耀數十里

德宗貞元二年正月大雨雪平地深尺餘雪上有黃黑色狀如浮埃

憲宗元和十三年十二月丙辰有白虹闊五尺東西亘天

敬宗寶歷元年十二月乙酉夜有霧起須臾遍天霧上有赤氣或深或淺久而乃散

武宗會昌四年正月己酉西方有白虹

懿宗咸通元年七月戊戌白虹橫亘西方己酉白虹橫
亘西方十一月丁酉戌時妖星初出如匹練亘空化爲
雲而沒在楚分 九年七月戊戌白虹橫亘西方

僖宗中和二年七月丙午夜西北有赤氣如絳竟天

昭宗光啟二年九月白虹見西方十月壬辰夜又如之
光化二年春有白氣竟天如練自西南徹東北而旋
天復三年三月庚申有曲虹在日西北

後唐明宗天成二年十二月壬辰酉時西南方有赤氣如火燄燄約二千里占者云不出二年其下當有大兵
晉高祖天福二年正月二日夜初北方有赤氣西至戌亥地東北至丑地南北濶三丈狀如火光赤氣內見紫微宮及北斗諸星至三點後內有白氣數條次西行至夜半子時方散 八年正月丙戌黃霧四塞 九年正月乙未大霧中二白虹相偶四月庚戌大霧中有蒼白二虹

末帝開運元年正月乙未大霧中有白虹相偶占者云海淫所興其將有戰時帝在澶州與契丹相守

周太祖廣順元年十一月甲子白虹竟天

宋太祖乾德三年七月己卯夜西方起蒼白氣長五十尺貫天船五車亘井宿占曰主兵動 六年十月己未亘西北蒼白氣三道長二十尺趨東散占曰游兵之象
太宗太平興國四年四月己未夜西北方有白氣壓北斗
雍熙三年正月己未夜赤氣如城占為兵 四年

正月癸酉夜白氣起角亢經太微垣厯軒轅大星至月旁散 端拱元年十月壬申暎明巽上有雲氣過中天連地濃潤前赤黃後蒼黑色先廣後大行勢如截占曰將領行陣有大克捷十一月戊午夜西北方有赤氣如日脚高二丈 至道二年二月丙子夜西方有蒼白氣長短八道如彗掃稍經天漢參錯如交蛇占曰所見之方主兵勝

真宗咸平三年十月辛亥黑氣貫北斗占曰兵起人疫

十二月庚午黑氣長三丈餘貫心宿入天市垣抵帝座
久方散 四年三月丙申白氣二亘天十月辛亥黑氣
貫北斗 五年正月白氣如虹貫日久而散七月戊戌
白氣如陣貫東井 六年四月己巳白氣東西亘天丁
丑白氣貫日五月辛亥白氣出昴至東壁沒六月辛未
赤氣出婁貫天庾占曰倉廩有火災丙子白氣出河鼓
左右旗分為數道沒七月癸卯白氣如彗起西南方占
曰有兵喪 景德元年三月白氣貫軒轅蒼白氣十餘

如布亘天七月辛亥黃氣出壁長五尺餘占曰兵出十
一月癸丑黑氣十餘道衝日 二年正月丙寅黃白氣
環之二月丁亥白氣五道貫北斗占為大風幸臣憂十
月丙子白氣出閣道西孛孛有光占曰宮中憂 三年
三月丙辰北方赤氣亘天白氣貫月十月甲午黑氣貫
北斗魁占曰邊兵起 四年三月己未白氣東西亘天
庚申白氣出南方長二丈許久而不散四月庚午白氣
貫北斗長十丈占為大風庚寅白氣如布襲月三丈許

甲午南方有黑氣貫心宿長五丈許占大水十一月已
巳中天有赤氣如掃長七尺在輿鬼南占曰秦兵疫

大中祥符元年正月癸亥朔黃氣出於艮占曰主五穀

熟丁丑白氣二東西亘天七月西北方白雲氣如彗帚

三十餘條占曰主兵戰 二年九月戊午黃氣如柱起

東南方長五丈許 三年四月丁巳中天有黑氣東西

亘天占為水十二月癸亥青赤氣貫太微 五年二月

壬寅白氣長五丈出東井貫北斗魁及軒轅占為兵為

雷雨 七年九月有氣出紫微為宮闕狀光燭地 天
禧三年四月黃氣如柱貫月占曰女后喜

仁宗天聖七年二月己卯夜蒼黑雲長三十尺貫弧矢
翼軫占曰荆楚水 明道元年十月庚子夜黃白氣五
貫紫微垣十二月壬戌西北有蒼白氣亘天 景祐元
年八月壬戌夜有黃白氣如彗長七尺餘出張翼之上
凡三十三日不見 四年七月戊申夜黑氣長丈餘出
畢宿下 寶元二年正月壬子夜蒼黑雲起西北長三

十尺漸東南行歷婁胃昂畢及火木相次中天而散占
曰水災倉穀腐敗敵主死邊兵憂若七日有雨則不占
三月甲寅夜細黑雲起西北方長三十尺貫王良及營
室占曰衛分大人憂 康定元年三月丙子夜東南方
近濁黑氣橫亘數丈闊尺許良久散占曰東南有水憂
六月壬子黑氣起心宿西長五十尺首尾侵濁久之散
占曰大雨水 二年八月庚辰夜東方有白氣長十尺
許在星宿度中至十日長丈餘衝天相居星宿大星南

九十餘日沒壬午夜黑氣起西南長七丈貫危宿羽林
入濁至天津良久散癸卯夜蒼白雲起西北闊二尺許
首尾至濁良久漫占曰其下有兵 慶歷二年十一月
壬申黑氣貫北斗柄甲申白氣貫北斗 三年正月戊
戌中天有白氣長二十尺向西南行貫日占曰邊兵憂
四月癸卯白氣二生西北隅上中天首尾至濁東南行
良久散占曰其下有兵寇七日有大風雨則不占七月
戊辰夜西南生黑氣長三尺許經天而散占曰雨水八

月壬子夜白氣貫北斗魁 四年五月甲子夜黑氣起
東北方近濁長五丈許良久散占曰大雨水宜治津梁
九月辛巳夜中天有白氣長二丈許貫參宿南河東北
行少頃散占曰風雨之候十一月甲子夜蒼白雲起南
近濁久方散占曰南方有兵寇七日有大風雨則不占
八年正月丁酉夜黑氣生首尾至濁漸東行久之不
散占曰水災二月辛卯夜西方近濁生黑氣長三丈許
良久散占曰水災 皇祐四年十一月壬寅夜黑氣生

東方南北至濁貫參宿軒轅占曰主邊境有火憂辛酉夜白氣起北方近濁長五丈許歷北斗久之散占曰多大風

英宗治平元年六月戊午夜蒼白雲起東北方長一丈許貫畢占云有兵禍二年二月乙未夜蒼黑雲起西北方長五丈許貫東井及北斗良久散占曰大水民疾病四月癸巳夜蒼黑雲起西北方長三十尺西至軒轅太民北抵鉤陳占曰雨水後宮有疾病之憂丙午夜西

北方有白氣漸東南行首尾至濁貫角宿移西北久方
散占曰有兵戰疾疫事九月庚申夜西北蒼黑雲長三
丈許貫營室壘壁陣及天河占曰土功興及雨水 三
年六月丁未夜東方有蒼白雲長一丈許貫畢占曰歲
不收亦陰雨之候

神宗治平四年二月癸巳夜蒼白雲起南方長三丈闊
尺貫南門星主兵出閏三月辛巳蒼黑雲起南方兩首
至濁闊尺貫尾箕斗牛庫樓騎官主陰雨五月戊寅夜

蒼黑雲起北方長三丈濶尺貫紫微垣王良主蕃國有
暴兵及奉車官憂壬寅夜蒼黑雲起北方長三丈濶尺
貫紫微垣主暴兵六月癸亥夜白雲起東北方長五丈
上閣下東貫天船閣道傳入紫微垣天棓主嗇夫遇賊
亦為雨候八月乙亥夜黑雲起西北方長丈濶尺貫北
斗主陰雨十月庚申夜黃氣一上下貫月中主女主憂
十二月庚戌夜蒼黑雲起南方長三丈濶二尺貫五車
東井五諸侯主陰雲 熙寧元年正月乙酉夜蒼白雲

起西南方長四丈闊尺貫月及南河鬼軒轅主秦分暴
兵六月己酉夜蒼黑雲起北方長二丈濶尺貫北斗魁
東貫文昌主三公疾民憂十月庚申夜蒼黑雲起北方
東西兩首至濁貫織女天棓紫微垣北斗魁主暴兵三
日有雨則解 二年四月甲辰夜蒼白雲起東南方長
二丈闊尺貫天市垣主人多疾疫七月甲申日下有五
色雲十一月每夕有赤氣見西北隅如火至人定乃滅
三年二月庚辰夜蒼黑雲起西北方長三丈闊二尺

貫王良扶箱天厨占同上 四年六月己未夜蒼黑雲起西北方長丈闊貫五車又起西北方長丈餘貫北斗魁文昌主大臣憂 五年七月丁亥夜白雲起南方長丈貫氐房心 六年五月庚申夜蒼黑雲起東北方長五丈闊二尺貫雲雨閣道 七年三月壬子蒼白雲起西南方長二丈闊尺貫日經中天過白氣如帶主兵四月壬申夜蒼白雲起北方長五丈闊二尺貫北斗魁鉤陳王良閣道東至奎六月辛未夜蒼黑雲起天河中長

五丈南北兩首至濁貫尾箕又蒼黑雲起東方長五大
貫羽林軍外屏丙戌夜蒼白雲起南方長二丈貫危室
壁及八魁主齊衛分憂或土木功壬辰夜蒼白雲起西
北方長二丈貫天棓紫微垣主分爭與刑罰藏兵禦難
備非常人之處有憂又主牛畜多死七月庚戌夜蒼白
雲起東方長丈餘貫參旗及參宜察臣下 八年二月
己巳夜蒼黑雲起東方長三丈貫心天市垣列肆宗星
主物貴五月癸亥夜蒼黑雲起西方長三丈貫軒轅太

微垣五帝座主諸侯憂十月庚子夜黑雲起西北方長
三丈貫畢大陵鉤星 九年四月庚寅夜白氣長丈起
東北方天市垣辛亥夜蒼黑雲起南方長二丈貫庫樓
騎官積卒心尾主憂六月乙未蒼白雲起東北方長四
丈貫室壁閣道主兵憂七月己卯夜蒼黑雲起南方長
四丈貫軍市天園主兵十月乙酉夜蒼黑雲起西北方
長四丈貫北斗鉤車府主雨 十年六月癸未夜蒼黑
雲起南方長三丈闊尺貫龜鼈天淵主多雨水七月丙

子夜蒼黑雲起北方長丈貫北斗魁主民憂貴臣獄或多雨八月庚辰蒼黑雲起東北方長二丈貫參井北河五諸侯主諸侯憂或大水九月庚申夜蒼黑氣起北方由北斗魁杓貫紫微垣至天棓元豐二年四月戊申夜白雲起南方長三丈貫庫樓積卒龍尾主將死或大臣黜五年四月壬申夜蒼白雲起北方長三丈出太微垣貫五帝座常陳主人主大喜八年七月庚申夜蒼黑雲生北方長三丈闊尺貫北斗文昌天槍主三日

內有雨及大臣黜

哲宗元祐三年七月戊辰夜東北方近濁天明照地如月將出漸徧西北有白氣經天主兵宜防西北二鄙

紹聖二年十一月桂陽監慶雲見 元符二年九月戊辰夜赤氣起北方紫微垣北斗星東南次有白氣十道各長五尺主兵及大臣黜

徽宗崇寧元年十一月己酉赤氣隨日沒主大旱及外有告急 二年五月戊子夜蒼白氣起東南方長三丈

貫尾箕斗主蠻夷入貢舊臣來歸 政和元年十一月
甲戌夜蒼白氣起紫微垣貫四輔主相凶 五年四月
庚子有白雲自北直徹中天漸成五色如華盖 七年
五月乙卯夜赤雲白氣起東北方主大旱民飢喪宣
和元年六月辛巳夜有赤氣起北方半天如火主臣叛
君 二年二月戊戌夜赤雲起東北漸向西北入紫微
垣主臣叛君天下兵起 三年九月壬午夜蒼白氣長
三丈貫月主其下有亂者 四年九月丁丑西方日下

有赤氣 七年四月壬子夜有赤雲入紫微垣主兵起
欽宗靖康元年正月丁丑夜赤白氣起西方主所向兵
至九月戊寅有赤氣隨日出十一月己丑日下有赤氣
閏十一月丁酉赤氣亘天 二年正月己亥夜西北陰
雲中有火長二丈餘闊數尺時時見丁未霧氣四塞人
對面不相視二月壬午夜白氣如虹自南亘北漸移西
南至東北二月戊子夜白氣貫斗

高宗建炎元年八月壬申東北方有赤氣 四年三月

辛亥白虹貫日京房易傳曰蜺日旁氣也白蜺雙出日
中茲謂擅陽五月壬子赤雲亘天中又有白氣十餘道
貫之如練起於紫微垣犯北斗及文昌由東南而散占
兵大起又所向兵至宮中有喪 紹興元年二月己巳
白氣亘天占有暴兵 七年十一月癸卯有赤雲如火
隨日入 八年二月辛巳日中有白虹亘天九月甲申
正北方有赤氣如火影 二十七年二月乙酉赤氣出
紫微垣壬寅白虹貫日 三十年二月壬申西北方正

北方東北方一帶約五處赤氣如火影十一月甲午西
南方白氣由尾宿歷壁宿婁宿昴宿止十二月戊申夜
白氣出尾宿歷心房氏亢角宿入天市貫太微至郎位
止有類天漢白氣主兵明年虜亮大入寇辛酉曲虹見
日之西占曰虹蜺陰陽交錯之氣曲虹冬見異之尤甚
也 三十一年十二月辛丑白氣自斗歷牛女虛

孝宗隆興元年十二月壬午白氣自危宿歷室壁婁胃
昴宿 二年正月甲寅白氣自壁宿歷奎婁昴畢觜參

乾道元年正月庚午夜白氣出奎漸上經婁胃昂貫
畢入參占主殺伐主邊城三月戊辰夜白氣自參宿至
角宿與天漢相接其白氣約廣七丈已來占有暴兵四
月丁酉夜蒼白氣自西北漸上東北入天市垣辛丑入
北斗魁中乙巳入紫微垣內至天極天樞中十一月丙
寅白氣出女歷虛危室壁上奎婁胃昂宿十二月庚午
白氣亘天 三年十月丙申虹出非時 四年三月己
丑四方皆昏濛若下塵占名曰霾語云天地霾君臣乖

五年正月甲申昏霧四塞又曰黃霧 六年十月庚

午赤氣隨日出占氣如火隨日出者軍行有兵憂十一

月丁丑赤氣隨日入占有告急者或檄天下召兵不行

七年六月壬寅十月戊午赤氣隨日出 八年十月

乙巳赤氣隨日入丙午赤氣隨日出占君側有佞臣

九年十月壬申日出前東方并日入後西方有雲氣若

煙非煙若雲非雲青赤黃三色光潤占凡氣有三色名

曰靄雲靄雲見則國有慶乃人君脩德而致 淳熙元

年十月戊寅東方生曲虹見日之東 二年十月庚辰東南方生青赤黃蠖虹虹生非時 三年八月丁酉赤氣隨日沒戊戌赤氣隨日出 五年十月丁巳曲虹見日之東 十年正月戊子西南有白氣如天漢而明 南北廣六丈東西亘天占有兵起 十四年十一月甲寅赤氣隨日入

光宗紹熙四年十一月甲戌夜赤雲白雲見占赤雲如火影見者如足帛天下多兵 五年六月壬寅白氣如

帶道亘天已酉亦然喪之象也於是孝宗崩寧宗受禪
寧宗慶元元年正月丙辰白虹貫日 四年八月庚辰
赤氣如帶亘天占有暴兵 五年二月癸酉夜白氣如
帶道亘天 嘉泰三年七月壬午白虹貫日 四年二
月庚申赤氣亘天次月臨安大火迫近太廟十一月虹
生非時壬申白氣如帶道亘天占有暴兵 嘉定六年
十月乙卯有赤氣隨日出十一月辛卯有赤氣隨日入
十一年二月丙辰白虹貫日

宋中興天文志曰書星變而至於蜺虹雷電非時
塵霧雲氣雜見必書何也凡皆氣也張自明曰一
元肇判分陰分陽輕清為天重濁為地逆生五行
順布五氣故五氣之會其精秀靈明者為日為月
為星為河漢五氣之散颺而為風和而為雨鬱而
為霧結而為雲舒而為霞凝而為露肅而為霜冽
而為雪戰而為雹擊而為雷爍而為電駁而為虹
其變十有二無非氣也而是氣之忽合忽分又各

有形有象殆不可徧舉其為災為祥亦或有應有
不應或應焉而人莫之知也然而推步宿曜之道
度分畫垣舍之名數覘象色之所見驗躔分之攸
屬參之於璣衡候之於晷漏探應感於精祲求形
驗於事情以考以告以戒以勸以慮以備占其有
益於人國太史遷曰孔子六經紀異而說不書至
於天道不傳傳其人不待告告非其人雖言不著
有味其言哉所志者占云

文獻通考卷二百九十四

欽定四庫全書

文獻通考卷二百九十五

鄱陽馬端臨貴與著

物異考一

總序

漢五行志漢興承秦滅學之後景武之世董仲舒治
公羊春秋始推陰陽為儒者宗宣元之後劉向治穀
梁春秋數其禍福傳以洪範

傳讀曰附謂附著或作
傳謂以洪範義傳而說

之與董仲舒錯

謂錯互不同也

至向子歆治左氏傳其春秋

意亦已乖矣言五行傳又頗不同是以摯仲舒別向

歆

摯與攄同謂引取之攄音來敢反

傳載睦孟夏侯勝京房谷永李

尋之徒所陳行事訖於王莽舉十二世以傳春秋著

於篇

傳讀曰附謂比附其事

經曰初一日五行五行一曰水二曰火三曰木四曰金

五曰土水曰潤下火曰炎上

皆從水火自然之性也

木曰曲直言

揉而曲可矯而直

金曰從革

革更也可更銷鑄也

土爰稼穡

爰於也可於其上稼穡也

種之曰稼
收聚曰穡

傳曰

五行傳
伏勝作

田獵不宿

不得其時也或曰不豫戒
曰不宿不戒以其時也

飲食

不享

不行享
獻之禮

出入不節奪民農時及有姦謀

李奇曰姦
謀增賦履

畝之事臣瓚曰姦謀謂邪謀也師古曰即
下所謂作為姦詐以奪農時李說是也

則木不曲直

說曰木東方也於易地上之木為觀其於王事威儀

容貌亦可觀也故行步有佩玉之度登車有和鸞之

節田狩有三驅之制飲食有獻享之禮出入有名使

民以時務在勸農桑謀在安百姓如此則木得其性

矣若乃田獵馳騁不反宮室飲食沉湎不顧法度妄興繇役以奪民時作為姦詐以傷民財則木失其性矣蓋工匠之為輪矢者多傷敗

如淳曰揉輪不曲矯矢不直也

及木

為變怪

臣瓚曰梓柱更生及變為人形是也

是為木不曲直

傳曰棄法律逐功臣殺太子以妾為妻則火不炎上

說曰火南方揚光輝為明者也其於王者南面嚮明而治書云知人則哲能官人故堯舜舉羣賢而命之朝遠四佞而放諸桀

古野反

孔子曰浸潤之譖膚受之愬

不行焉可謂明矣賢佞分別官人有序帥由舊章敬
重功勲殊別嫡庶如此則火得其性矣若乃信道不
篤或耀虛偽讒夫昌邪勝正則火失其性矣自上而
降及濫炎妄起焚宗廟燒宮館雖興師衆不能救也
是為火不炎上

傳曰修宮室飾臺榭內淫亂犯親戚侮父兄則稼穡不
成

說曰土中央生萬物者也其於王者為內事宮室夫

婦親屬亦相生者也古者天子諸侯宮廟大小高卑
有制后夫人媵妾多少有度九族親疎長幼有序孔
子曰禮與其奢也寧儉故禹卑宮室文王刑于寡妻
此聖人之所以昭教化也如此則土得其性矣若乃
奢淫驕慢則土失其性亡水旱之災而草木百穀不
孰是為稼穡不成

傳曰好戰攻輕百姓飾城郭侵邊境則金不從革

說曰金西方萬物既成殺氣之始也故立秋而鷹隼

擊秋分而微霜降其於王事出軍行師把旌仗鉞誓
士衆抗威武所以征叛逆止暴亂也詩云有虔秉鉞
如火烈烈又曰載戢干戈載櫜弓矢動靜應宜說以
犯難人忘其死金得其性矣若乃貪慾恣睢務立威
勝不重人命則金失其性蓋工冶鑄金鍊冰滯涸堅
不成者衆乃為變怪是為金不從革

傳曰簡宗廟不禱祠廢祭祀逆天時則水不潤下

說曰水北方終藏萬物者也其於人道命終而形藏

精神放越聖人為之宗廟以收魂氣春秋祭祀以終
孝道王者即位必郊祀天地禱祈神祇望秩山川懷
柔百神亡不宗事

師古曰懷來也柔安也謂招來而祭祀之使其安也宗尊也

慎

其齋戒致其嚴敬鬼神歆饗多獲福助此聖王所以
順事陰氣和神人也至發號施令亦奉天時十二月
咸得其氣則陰陽調而終始成如此則水得其性矣
若乃不敬鬼神政令逆時則水失其性霧水暴出百
川逆溢壤鄉邑溺人民及淫雨傷稼穡是為水不潤

下京房易傳曰顓事有知誅罰絕理厥灾水其水也

雨殺人以隕霜大風天黃飢而不損茲謂泰厥灾水

水殺人辟遇有德茲謂狂

應劭曰辟天子也有德者雍遇不見用也師古曰遇

音一厥灾水水流殺人已水則地生蟲歸獄不解茲

謂追非

李奇曰歸罪過於民不罪己也張晏曰謂釋有罪之人而歸無辜者也解止也追非遂非

也厥水寒殺人追誅不解茲謂不理厥水五穀不收

大敗不解茲謂皆陰解舍也王者於大敗誅首惡赦

其衆不則皆函陰氣

師古曰函與舍同

厥水流入國邑隕霜

殺穀

經曰敬用五事五事一曰貌二曰言三曰視四曰聽五

曰思貌曰恭言曰從視曰明聽曰聰思曰睿睿通也古文作睿

恭作肅從作艾讀曰又治也明作愼聰作謀上聰則下謀故聰為謀也睿

作聖休徵善行之曰肅時雨若又時暘若愼時燠若謀

時寒若聖時風若凡言時者皆謂行得其道則咎徵言

行之曰狂恒雨若僭恒暘若僭僭差舒恒燠若急恒寒若

霽恒風若服虔曰霽音人備反應劭曰人君散霽鄙吝則風不順之也師古曰凡言恒者謂所行者

失道則寒暑風雨不時而恒久為
灾也霧音莫豆反散音構又音冠

傳曰貌之不恭是謂不肅厥咎狂厥罰恒雨厥極惡時

則有服妖時則有龜孽

鄭元曰龜蟲之生於水而游於春者屬木

時則有鷄

禍鄭元曰鷄畜之有冠翼者也屬貌

時則有下體生上之病

鄭元曰病也貌氣

失之病也漢書音義曰若梁孝王之時牛足反出背上也

時則有青眚青祥

鄭元曰青木色

也眚生於此祥自外来也

唯金沴木

服虔曰沴害也如淳曰沴音拂戾之戾義亦同鄭元曰沴殄也

凡貌言視聽思心一事失則逆人之心人心逆則怨木
金水土火氣為之傷傷則衝勝来乘殄之於是神怒人
怨將為禍亂故五行先見變異以譴告人也及妖孽禍
病告祥皆其氣類暴作非常時為怪者也各以物象為

也之占凡六沴之作歲之朝月之朝日之朝則后王受之

歲之中月之中日之中則正卿受之歲之夕月之夕日

之夕則庶民受之

鄭元曰自正月盡四月為歲之朝自五月盡八月為歲之中自九月盡十

二月為歲之夕上旬為月之朝中旬為月之中下旬為月之夕平旦至食時為日之朝禺中至日昃為日之中

晡時至黃昏為日之夕受之受其凶咎也其二辰以次相將其次受之鄭元

辰謂日月也假令歲之朝也日月中則上公受之日月夕則下公受之歲之中也日月朝則孤卿受之日月夕

則大夫受之歲之夕也日月朝則上士受之日月中則下士受之其餘差以尊卑多少則悉矣

說曰凡草木之類謂之妖妖猶天胎言尚微也蟲豸

池尔反之類謂之孽孽則芽孽矣及六畜謂之禍言其

著也及人謂之痾痾病貌也言寤

作任反

深也甚則異

物生謂之眚自外来謂之祥祥猶禎也氣相傷謂之
沴沴猶臨莅不和意也每一事云時則以絕之非必
俱至或有或亡或在前或在後孝武時夏侯始昌通
五經善推五行傳以傳族子夏侯勝下及許商皆以
教所賢弟子其傳與劉向同惟劉歆傳獨異貌之不
恭是謂不肅肅敬也內曰恭外曰敬人君行己體貌

不恭怠慢驕蹇則不能敬萬事失在狂易故其咎狂也上慢下暴則陰氣勝故其罰常雨也水傷百穀衣食不足則姦宄並作故其極惡也一曰人多被刑或形貌醜惡亦是也風俗狂慢變節易度則為剽

反匹妙

輕竒怪之服故有服妖水類動故有龜孽於易巽為雞雞有冠距文武之貌而不為威貌氣毀故有雞禍一曰水歲多雞死及為怪亦是也上失威儀則有彊臣害君上者故有下體生於上之病木色青故有青

青青祥凡貌傷者病木氣木氣病則金沴之衝氣相通也於易震在東方為春為木兌在西方為秋為金離在南方為夏為火坎在北方為冬為水春與秋日夜分寒暑平是以金木之氣易以相變故貌傷則致秋陰常雨言傷則致春陽常旱也至於冬夏日夜相反寒暑殊絕水火之氣不得相并故視傷常燠聽傷常寒者其氣然也逆之其極曰惡順之其福曰攸好德劉歆貌傳曰有鱗蟲之孽羊禍鼻痂說以為於天

文東方辰為龍星故為鱗蟲於易兌為羊木為金所
病故致羊禍與常雨同應此說非是春與秋氣陰陽
相敵木病金盛故能相并惟此一事耳禍與妖病祥
眚同類不得獨異

傳曰言之不從是謂不乂厥咎僭厥罰恒暘厥極憂時
則有詩妖時則有介蟲之孽時則有犬禍時則有口舌
之病時則有白眚白祥惟木沴金

說曰言之不從從順也是謂不乂乂治也孔子曰君

子居其室出其言不善則千里之外違之況其邇者

乎詩曰如蜩調音如蟬唐音如沸如羹言上號令不順人

心虛譁華音憤亂則不能治海內失在過差故其咎僭

差也刑罰妄加羣陰不附則陽氣勝故其罰常暘也

旱傷百穀則有寇難上下俱憂故其極憂也君炕皓

反陽而暴虐臣畏刑而箱巨淹反口則怨謗之氣發於

歌謠故有詩妖介蟲孽者謂小蟲有甲飛揚之類陽

氣所生也於春秋為螽終音今謂之蝗皆其類也於易

兌為口犬以吠守而不可信言氣毀故有犬禍一曰

旱歲犬多狂死及為怪亦是也及人則多病口喉欬

若愛嗽蘇豆反

者故有口舌病金色白故有白青白祥

凡言傷者病金氣金氣病則木沴之其極憂者順之
其福康寧劉歆言傳曰時則有毛蟲之孽說以為天
文西方參為獸星故為毛蟲

傳曰視之不明是謂不愆厥咎舒厥罰恒燠厥極疾時

則有草妖時則有羸蟲之孽

師古曰蠃螟之類無鱗甲毛羽故謂之羸蟲也音郎

果時則有羊禍時則有目痾時則有赤眚赤祥惟水沴火

說曰視之不明是謂不愬愬知也詩云不明爾德時

無背無側爾德不明以無陪無卿

師古曰大雅蕩之詩也言不別善惡

有逆背傾仄者有堪為卿大夫者皆不知之也仄古側字

言上不明暗昧蔽惑則

不能知善惡親近習長同類

師古曰習狎也近狎者則親愛之同類者則長

也益亡功者受賞有罪者不殺百官廢亂失在舒緩故

其咎舒也盛夏日長暑以養物政弛緩故其罰常燠

也燠則冬溫春夏不和傷病民人故極疾也誅不行

則霜不殺草繇臣下則殺不以時

師古曰繇讀與由同言誅罰由於臣

下故有草妖凡妖貌則以服言則以詩聽則以聲視

則以色者五色物之大分也在於青祥故聖人以為

草妖失秉之明者也

師古曰謂失所執之權也音彼命反

溫燠生蟲故

有羸蟲之孽謂螟螣之類

師古曰螟食苗心螣食苗葉之蟲也螟音冥螣音徒

得反當死不死未當生而生或多於故而為災也劉歆

以為厲思心不容於易剛而包柔為離

師古曰兩陽居外一陰在

內云剛包柔離為火為目羊上角下蹄剛而包柔羊大目

而不精明視氣毀故有羊禍一曰暑歲羊多疫死及為怪亦是也及人則多病目者故有目病火色赤故

有赤眚赤祥凡視傷者病火氣火氣傷則水沴之其

極疾者順之其福曰壽

李奇曰於六極之中為疾者逆火氣致疾病也能順火氣

則禍更為福

劉歆視傳曰有羽蟲之孽雞禍說以為天文

南方喙為鳥星故為羽蟲禍亦從羽故為雞雞於易自在巽說非是庶徵之恒燠劉向以為春秋亡冰也

小燠不書無冰然後書舉其大者也京房易傳曰祿
不遂行茲謂欺厥咎燠雨雪四至而溫臣安祿樂逸
茲謂亂燠而生蟲知罪不誅茲謂舒其燠夏則暑殺
人冬則物華實重過不誅茲謂亡徵其咎當寒而燠
六日也

傳曰聽之不聰是謂不謀厥咎急厥罰恒寒厥極貧時
則有鼓妖時則有魚孽時則有豕禍時則有耳病時則
有黑眚黑祥惟火沴水

說曰聽之不聰是謂不謀言上偏聽不聰下情隔塞則不能謀慮利害失在嚴急故其咎急也盛冬日短寒以殺物政促迫故其罰常寒也寒則不生百穀上下俱貧故其極貧也君嚴猛而閉下臣戰栗而塞耳則妄聞之氣發於音聲故有鼓妖寒氣動故有魚孽雨以龜為孽

服虔曰多雨則龜多出

龜能陸處非極陰也魚去

水而死極陰之孽也於易坎為豕豕大耳而不聰察聽氣毀故有豕禍也一曰寒歲豕多死及為怪亦是

也及人則多病耳者故有耳病水色黑故有黑眚黑祥凡聽傷者病水氣水氣病則火沴之其極貧者順之其福曰富劉歆聽傳曰有介蟲孽也

傳曰思之不睿是謂不聖厥咎霧

莫豆反

厥罰恒風厥極

凶短折時則有脂夜之妖時則有華孽時則有牛禍時則有心腹之病時則有黃眚黃祥時則有金木水火沴土

說曰思心之不睿是謂不聖思心者心思慮也睿寬

也孔子曰居上不寬吾何以觀之哉言上不寬大色

容臣下則不能居聖位貌言視聽以心為主四者皆

失區霧無識

師古曰區音口豆反霧音莫豆反其下並同

故其咎霧也雨

旱寒燠亦以風為本四氣皆亂故其罰常風也常風

傷物故其極凶短折也傷人曰凶禽獸曰短草木曰

折一曰凶夭也兄喪弟曰短父喪子曰折在人腹中

肥而包裹心者脂也心區霧則冥晦故有脂夜之妖

師古曰脂妖及夜妖

一曰有脂物而夜為妖若脂水夜汙人衣

淫之象也一曰夜妖者雲風並起而杳冥故與常風

同象也溫而風則生螟螣有裸蟲之孽

師古曰裸亦羸字也從衣

果劉向以為於易巽為風為木卦在三月四月繼陽

而治主木之華實風氣盛至秋冬木復華故有華孽

一曰地氣盛則秋冬復華一曰華者色也土為內事

為女孽也於易坤為土為牛牛大心而不能思慮思

心氣毀故有牛禍一曰牛多死及為怪亦是也及人

則多病心腹者故有心腹之痾土色黃故有黃眚黃

祥凡思心傷者病土氣土氣病則金木水火沴之故
曰時則有金木水火沴土不言惟而獨曰時則有者
非一衝氣所沴明其異大也其極曰凶短折順之其
福曰考終命劉歆思心傳曰時則有羸蟲之孽謂螟
螣之屬也

傳曰皇之不極是謂不建厥咎眊音耄厥罰恒陰厥極弱

時則有射妖時則有龍蛇之孽時則有馬禍時則有下

人伐上之病鄭元曰夏侯勝說伐宜為代書亦或作伐
陰陽之神曰精氣性情之神曰魂魄君行

不由常併張無度則是魂魄傷也皇極氣失之病也天於不中之人恒耆其毒增以為病將以開賢代之也春秋傳所謂奪伯有魄者是也時則有日月亂行星辰逆不名病者病不著於身體也

行

說曰皇之不極是謂不建皇君也極中建立也人君貌言視聽思心五事皆失不得其中則不能立萬事

失在眊悖故其咎眊也

師古曰眊不明也悖惑也音布內反

王者自下

承天理物雲起於山而彌於天

師古曰彌滿也

天氣亂故其

罰常陰也一曰上失中則下彊盛而蔽君明也易曰

亢龍有悔貴而亡位高而亡民賢人在下位而亡輔

師古曰乾上九文言也

如此則君有南面之尊而亡一人之助

故其極弱也盛陽動進輕疾

服虔曰陽行輕且疾也

禮春而大

射以順陽氣

韋昭曰將祭典羣臣射謂之大射

上微弱則不奮動故

有射妖易曰雲從龍

師古曰乾九五文言

又曰龍蛇之蟄以存

身也

師古曰下繫辭也

陰氣動故有龍蛇之孽於易乾為君

為馬馬任用而彊力君氣毀故有馬禍一曰馬多死

及為怪亦是也君亂且弱人之所叛天之所去不有

明王之誅則有篡弑之禍故有下人伐上之病凡君
道傷者病天氣不言五行沴天而曰日月亂行星辰
逆行者為若下不敢沴天猶春秋曰王師敗績於貿
戎不言敗之者以自敗為文尊尊之意也劉歆皇極
傳曰有下體生上之病說以為下人伐上天誅已成
不得復為病云

唐史五行志序曰萬物盈於天地之間而其為物
最大且多者有五一日水二曰火三曰木四曰金

五曰土其用於人也非此五物不能以為生而闕其一不可是以聖王重焉夫所謂五物者其見象於天也為五星分位於地也為五方行於四時也為五德稟於人也為五常播於音律為五聲發於文章為五色總其精氣之用謂之五行自三代之後數術之士興而為災異之學者務極其說至舉天地萬物動植無大小皆推其類而附之於五物曰五行之屬以謂人稟五行之全氣以生故於物

為最靈其餘動植之類各得其氣之偏者其發為
英華美實氣臭滋味羽毛鱗介文采剛柔亦皆得
其一氣之盛至其為變怪非常失其本性則推以
事類吉凶影響其說尤為委曲繁密蓋王者之有
天下也順天地以治人而取材於萬物以足用若
政得其道而取不過度則天地順成萬物茂盛而
民以安樂謂之至治若政失其道用物傷天民被
其害而愁苦則天地之氣沴三光錯行陰陽寒暑

失節以為水旱蝗螟風電雷火山崩水溢泉竭雪
霜不時雨非其物或發為氛霧虹蜺光怪之類此
天地災異之大者皆生於亂政而考其所發驗以
人事往往近其所失而以類至然時有推之不能
合者豈非天地之大固有不可知者邪若其諸物
種類不可勝數下至細微家人里巷之占有考於
人事而合者有漠然而無所應者皆不足道語曰
迅雷風烈必變蓋君子之畏天也見物有反常而

為變者失其本性則思其有以致而為之戒懼雖
微不敢忽而已至為災異之學者不然莫不指事
以為應及其難合則旁引曲取而遷就其說蓋自
漢儒董仲舒劉向與其子歆之徒皆以春秋洪範
為學而失聖人之本意至其不通也父子之言自
相戾可勝歎哉昔者箕子為周武王陳禹所有洪
範之書條其事為九類別其說為九章謂之九疇
考其說初不相附屬而向為五行傳乃取其五事

皇極庶徵附於五行以為八事皆屬五行歟則至
於八政五紀三德稽疑福極之類又不能附至俾
洪範之書失其倫理有以見所謂旁引曲取而遷
就其說也然自漢以來未有非之者又其祥眚禍
疢之說自其數術之學故略存之庶幾深識博聞
之士有以考而擇焉夫所謂災者被於物而可知
者也水旱螟蝗之類是已異者不可知其所以然
者也日食星孛五石六鷁之類是已孔子於春秋

記災異而不著其事應蓋慎之也以謂天道遠非
諄諄以諭人而君子見其變則知天之所以譴告
恐懼脩省而已若推其事應則有合有不合有同
有不同至於不合不同則將使君子怠焉以為偶
然而不懼此其深意也蓋聖人慎而不言如此而
後世猶為曲說以妄意天此其不可以傳也故考
次武德以來略依洪範五行傳著其災異而削其
事應云

老泉蘇氏曰五行含羅九疇者也五事檢御五行者也皇極裁節五事者也今夫皇極之建也貌必恭恭作肅言必從從作乂視必明明作哲聽必聰聰作謀思必睿睿作聖如此則五行得其性雨暘燠寒風皆時而五福應矣若夫皇極之不建也貌不恭厥咎狂言不從厥咎僭視之不明厥咎豫聽不聰厥咎急思不睿厥咎蒙如此則五行失其性雨暘燠寒風皆常而六極應矣歆向之惑始於福

極分應五事遂強為之說故其失寔廣而有五焉
今其傳以極之惡福之攸好德歸諸貌極之憂福
之康寧歸諸言極之疾福之壽歸諸視極之貧福
之富歸諸聽極之凶短折福之考終命歸諸思所
謂福止此而已所謂極則未盡其弱焉遂曲引皇
極以足之劉向五行傳云皇之不極厥極弱皇極非五事匹其不
建之咎止一極之弱哉其失一也且逆而極順而
福傳之例也至皇之不極則其極既弱矣吾不識

皇之極則天將以何福應之哉若曰五福偕應則
皇之不極惡憂疾貧凶短折曷不偕應哉此乃自
廢其例其失二也箕謂咎曰狂僭豫急蒙而已罰
曰雨暘燠寒風而已今傳又增咎以眊增罰以陰
五行傳云皇之不極
厥咎眊厥罰常陰此其據聖人之言以就固謬
况眊與蒙無異而陰可兼之而別名之得乎其失
三也經之首五行而次五事者徒以五行天而五
事人人不可以先天耳然五行之逆順必視五事

之得失使吾為傳必以五事先五行借如傳貌之不恭是謂不肅厥咎狂則木不曲直厥罰常雨其餘亦如之察劉之心非不欲爾蓋五行盡於思無以周皇極苟如庶驗增之則雖蠢亦恠駭矣故離五行五事而為解以蔽其釁其失四也傳之於木其說以為貌矣及火土金水則思言視聽殊不及焉自相駁亂其失五也夫九疇之於五行可以條而入者惟二箕子陳之蓋有深旨矣五事一也庶

驗二也驗之肅又哲謀聖一出於五事事之貌言
視聽思一出於五行此理之自然可不條而入之
乎其他八政五紀三德稽疑福極其大歸雖無越
於五行五事非可條而入之者也條而入非理之
自然故其傳必鉤牽扳援文致而強附之然後可
以僅知此福此極之所以應此事者立言如此其
亦勞矣且傳於福極既爾則於八政五紀三德稽
疑亦當爾而今又不爾何也經曰五皇極皇建其

有極斂時五福用敷錫厥庶民此言皇極建而五福備使經云皇極之不建則必以六極易五福矣焉在其條而入之乎且皇極九疇之尤貴者故聖人位之於中以貫上下譬如庶驗然曰雨曰暘曰燠曰寒曰風曰時時於雨暘燠寒風各冠其上耳又可列之為一驗乎若是則劉之傳惑且強明矣噫傳之法二劉唱之班固志之

班固敘傳云河圖命庖洛書賜禹八

卦成列九疇迨敘春秋之占咎證是舉後之史志告往知來王事之表述五行志第七

五行者孰不師而效之世之讀者又孰不從而然之是以膠為一論莫有考正吾得無言哉

夾漈鄭氏曰仲尼既沒先儒駕以妖妄之說而欺後世後世相承罔敢失墜者有兩種學一種妄學務以欺人一種妖學務以欺天凡說春秋者皆謂孔子寓褒貶於一字之間以陰中時人使人不可曉解三傳唱之於前諸儒從之於後盡推己意而誣以聖人之意此之謂欺人之學說洪範者皆謂

箕子本河圖洛書以明五行之旨劉向創釋其傳
於前諸史因之而為志於後析天下災祥之變而
推之於金木水火土之域乃以時事之吉凶而曲
為之配此之謂欺天之學夫春秋者成周之典也
洪範者皇極之書也臣舊作春秋傳專以明王道
削去三家褒貶之說所以杜其妄今作災祥略專
以記實迹削去五行相應之說所以絕其妖且萬
物之理不離五行而五行之理其變無方離固為

火矣而離中有水坎固為水矣而坎中有火安得
直以秋大水為水行之應成周宣榭火為火行之
應乎况周得木德而有赤鳥之祥漢得火德而有
黃龍之瑞此理又如何耶豈其晉厲公一視之遠
周單公一言之徐而能關於五行之沴乎豈其晉
申生一衣之偏鄭子臧一冠之異而能關於五行
之沴乎如是則五行之繩人甚於三尺矣臣竊觀
漢儒之說以亂世無如春秋之深災異無如春秋

之衆者是不考其實也臣每謂春秋雖三王之亂
世猶治於漢唐之盛時何哉春秋二百四十二年
而日食三十六唐三百年而日食過百舉春秋地
震五漢河平中積二十一日而地百二十四動舉
春秋山傾者二漢文帝時一年之間齊楚山二十
九所同日圯舉春秋大水者八後漢延平中一月
之間郡國三十六大水其他小小災異則二百四
十年之事不及後世一年也如李梅冬實鸛鵒來

巢之類在後世不勝書使春秋之人而親見後世
事豈但慟哭流涕而已哉以春秋視後世不為亂
世也何哉後世之法度不及春秋之法度後世之
人才不及春秋之人才其所以感和氣而彌災異
者又安可望春秋乎嗚呼天地之間災祥萬種人
間禍福冥不可知奈何以一蟲之妖一氣之戾而
一一質之為禍福之應其愚甚矣况凶吉有不由
於災祥者宋之五石六鷁可以為異矣而內史叔

興以為此陰陽之事非吉凶所生魏安平太守王基筮於管輅輅曰君家有三怪一則生男女墮地走入竈死二則大蛇牀上銜筆三則烏來入室與燕鬪兒入竈者宋無忌之妖蛇銜筆者老書佐之妖烏與燕鬪者老鈴下之妖此三者足以為異而無凶兆無所憂也王基之家卒以無患觀叔興之言則國不可以災祥論興哀觀管輅之言則家不可以變怪論休咎惟有和氣致祥乖氣致異者可

以為通論

按古今言災異者始於五行傳而歷代史氏所述災異因之然必曰某事召某災證合某應如醫師之脉訣占書之繇辭則其說太牽強而拘泥老泉之論足以正其牽強之失夾漈之論足以破其拘泥之見然鄭論一歸之妖妄而以為本無其事應則矯枉而至於過正矣是謂天變不足畏也不如蘇論之正大云

禮記禮運故聖王所以順山者不使居川不使渚者居

中原而弗敝也

使各安其居不勞敝之也

用水火金木飲食必時水

謂漁人以時漁為梁春獻鼈蜃秋獻龜魚也用火謂司燿四時變國火以救時疾及季春出火季秋納火是也

用金謂升人以時取金玉錫石也用木謂山虞仲冬斬陽木仲夏斬陰木飲食謂食齊視春時羹齊視夏時醬

齊視秋時飲齊視冬時

合男女頒爵必當年德

謂媒氏令男三十而娶女二十而嫁

司士稽士任進退其爵祿

用民必順

不奪農時

故無水旱昆蟲之災民無

凶饑妖孽之疾故天不愛其道地不愛其實人不愛其

情

言嘉瑞出人

情至也故天降膏露地出醴泉山出器車河出馬

圖鳳凰麒麟皆在郊椒龜龍在宮沼其餘鳥獸之卵胎
皆可俯而窺也器謂若銀甕丹甑也椒聚草也疏按禮
緯斗威儀云其政太平山車垂鉤註云
山車自然之車垂鉤不揉治而則是無故非有他事先
自圓曲也銀甕丹甑援神契云

王能脩禮以達義體信以達順故此順之實也

歐陽氏五代史王建世家論曰嗚呼自秦漢以來
學者多言祥瑞雖有善辯之士不能祛其惑也予
讀蜀書至於龜龍麒麟騶虞之類凡世所謂王者
之嘉瑞莫不畢出於其國異哉然考王氏之所以

興亡成敗者可以知之矣或以為一王氏不足以當之則視當時天下治亂可以知之矣龍之為物也以不見為神以升雲行天為得志今偃然暴露其形是不神也不上於天而下見於水中是失職也然其一何多歟可以為妖矣鳳凰鳥之遠人者也昔舜治天下政成而民悅命變作樂樂聲和鳥獸聞之皆鼓舞當是之時鳳凰適至舜之史因并記以為美後世因以鳳來為有道之應其後鳳凰

數至或出於庸君繆政之時或出於危亡大亂之際是果為瑞哉麟獸之遠人者也昔魯哀公出獵得之而不識蓋索而獲之非其自出也故孔子書於春秋曰西狩獲麟者譏之也西狩非其遠也獲麟惡其盡取也狩必書地而哀公馳騁所涉地多不可徧以名舉故書西以包衆地謂其舉國之西皆至也麟人罕識之獸也以見公之窮山竭澤而盡取至於不識之獸皆搜索而獲之故曰譏之也

聖人已沒而異端之說興乃以麟為王者之瑞而附以符命讖緯詭怪之言鳳嘗出於舜以為瑞猶有說也及其後出於亂世則可以知其非瑞矣若麟者前有治世如堯舜禹湯文武周公之世未嘗一出其一出而當亂世然則孰知其為瑞哉龜元物也污泥川澤不可勝數其死而貴於卜官者用適有宜爾而戴氏禮以其在宮沼為王者難致之瑞戴禮雜出於諸家其失亦已多矣騶虞吾不知

其何物也詩曰吁嗟乎騶虞賈誼以為騶者文王之囿虞虞官也當誼之時其說如此然則以之為獸者其出於近世之說乎夫破人之惑者難與爭於篤信之時待其有所疑焉然後從而攻之可也麟鳳龜龍王者之瑞而出於五代之際又皆萃於蜀此雖好為祥瑞之說者亦可疑也因其可疑者而攻之庶幾惑者有以思焉

致堂胡氏曰草木之秀異禽獸之珍奇雲物之變

動無時無之係時好與不好耳以為祥瑞注意於多有雖元狩之麟神爵之鳳尚可力致蓋嘗有好芝草者一日官吏入深山窮谷間覆地皆芝也蓋數千萬本遂擇其尤者少取以復命又况智巧之徒能偽造乎花卉可以染植增其態毛羽可以餵飼變其色雖石脉木理猶且假幻使成文字惟上之人泊然無欲於此也苟欲之則四面而至矣漢章帝時以瑞物仍集改元章和而何敞謂宋由袁

安曰夫瑞應依德而至災異緣政而生今異鳥翔於殿屋怪草生於庭際不可不察由安懼不敢答夫二人位冠羣臣乃為諂媚之習蒙蔽之行以侈逸上心使忽忘警戒不亦昧於責難正抹之道乎按古今言祥瑞者詳於禮運而歷代史氏所述祥瑞因之然有無其證而有其應者又有反當為妖而謬以為祥者歐陽公胡氏致堂之論誼正詞偉足以祛千古之惑破諂子之謬故備著之

文獻通考卷二百九十五